

SCRITTI ZITELLINI
SCOLA DI PADULELLA
CM1 : 1980 - 1981 - 1982
MAESTRU : GHJISEPPU LEONI
ADECEC CERVIONI 1995

A raza.

Un ghjornu mi bagnava in mare. Nutendu à capu ciottu aghju vistu una raza tamant'è un paracqua, gialliccia è pichjinata di turchinu nantu à u spinu. Sò scappata è trimava da tantu chì aghju avutu paura d'issu mostu spaventosu.

Fiurenu, 9 anni

A festa di a Madonna.

L'8 di sittembre sò andata à a festa di a Madonna cù a mo mamma. Avimu seguitatu a prucedione è pregatu. Dopu sò andata à fami un giru à tutti i banchetti di merchanti chì vendianu da beie, da manghjà, panni, scarpi, pignule, guvelli, ghjoculi... Aghju compru una cullana di perle turchine è un anellu cù una perla rossa.

Marielena, 10 anni.

E lasagne.

Dumenica scorsa, avemu fattu e lasagne.

Mamma hà messu a farina nantu à a tavula è l'hà minata cù l'acqua. Quandu a pasta era ripusata, mamma l'hà spianata cù u rotulu, l'hà appezzata è po l' hà messa à coce. Dopu hà scolatu l'acqua è hà savuritu e lasagne di salza di carne è di casgiu grattulatu.

Ci simu liccati !

Anna, 10 anni.

U zoo di Frejus.

Dui anni fà sò andata à u zoo di Frejus. Per entre aghju pagatu cinque franchi. À l'intrata ci hè una baracca dov'omu vende a nutritura per allusingà l'animali.

Aghju vistu oche, sumeri, una mufra, un elefante, scimie è altri animalotti chì vivenu in libertà.

E scimie sò curiose ; facenu i versi quand'omu li passa dinanzu, è s'omu si scorda di chjode e vitture, entrenu nentru è ùn ci lascianu un raschju.

Veronica, 10 anni.

A raccolta di e persiche.

Mercuri passatu sò andatu cù babbu à coglie e persiche à l' Acqua Calla. N' avemu coltu parechje casce è l'avemu carcate nantu à a rimorca di u trattore. Dopu simu andati à purtalle à a cuperativa.

Quando a rimorca hè stata scarca, ci ne simu ghjunti in casa cù a nostra vettura.

Francescu, 10 anni.

U bagnu.

Quand'è no eramu chjuchi, ci lavavamu tutti insieme ind' a bagnarola. Era un ghjocu per noi. Alice, a mo surelluccia era l'ultima à compie è li viutavamu a bagnarola quand'ella era sempre nentru. Tandu stridava cum' è una persa chjamendu à mamma. Avia a paura di smarì cù l'acqua pè u tufone di u scolu.

Patricu, 10 anni.

U pranzu.

Dumenica, sò andata cù mamma è babbu in Cervioni per manghjà ind'è mammine. À tavula ci eranu cannelloni è, à chì vulia, migliacciole.

Eiu aghju manghjatu pocu, sapendu chì, per compie, ci era una torta di e più bone : era a festa di babbu è, attempu, l'anniversariu di zia.

Natalina, 10 anni.

I cunigliuli.

U mese passatu a nostra cunigliula hà cunigliulatu d'ottu cunigliulucci. U nostru vicinu hà avutu à facci una gabbia maiò per pudè allevalli tutti.

L'avimu mantenuti à rombu di saccate d'erba è di carotte è sò ingrandati prestu.

Ma figuratevi chì eri a nostra cunigliula n'hà fattu torna dece.

Ghjuvannina, 10 anni.

A' coglie l'erba.

Mercuri sò andata cù u mo fratellu à coglie l'erba pè i cunigliuli. Aviamu un saccu per unu. Eiu strappava ind' una striscia di a vigna è fratellumu strappava ind' un'altra. Quando i sacchi eranu colmi è imburati ci ne simu ghjunti. Eramu stanchi è ci sentia u spinu.

Ghjuvannina, 10 anni.

U battellu ingunfievule.

In cor di vacanze d'estate, cù i mo amichi, simu andati à u fiume di l'Infernù per nutà. Aviamu purtatu un battellucciu ingunfievule. Quand'è no eramu à mezu di l'onda, u battellu s' hè sgunfiatu è l'acqua entrava nentru. Avemu capalzatu è simu falati tutti in l'acqua, calzi è vistuti. Simu isciuti chì sapianu nutà, ma avimu avutu à fà asciuvà i nostri panni à u sole nanzu di pudè rientre.

Ghjiseppu, 10 anni.

U tempurale.

A simana passata hè piossu è fattu u ventu. I ghjamboni di i castagni si turcianu è truncavanu. E fronde vulavanu per L'aria chì parianu acelli, invece chì l'acelli, smariti da u celu, s'aggruttavanu cum'elli pudianu sottu à i tetti di i baracconi. L'aria era ghjalata. U mare smossu è biancu di sciuma murmava cum'è u tonu.

Un' ci era l'arte di dorme da u furore è i fulmini.

Cristianu, 9 anni.

U cignale.

Quindici ghjorni fà, babbu hè andatu à caccia cù i so cumpagni. Anu tombu un cignale maiò è unu chjucucciu. A sera, versu cinque ore, hè rientratu in casa c'un bellu cuscio cignalinu ind'a sacchetta. A mo mamma l'hà cucinatu in salza à a stretta è u lindumane, à cullazione, ci simu liccati.

Catalina, 10 anni.

L'acellu.

L'altreroni ma facia un giru nantu à u mo cavalluseccu. In più bella, un acellu inticcia ind'a mo testera è casca in terra, feritu à l'ala. Sò piantatu, l'aghju pigliatu in manu è l'aghju purtatu in casa. L'aghju medicatu è messu in gabbia sperendu ch'ellu megliurassi.

U lindumane a gabbia era viota è u mo misgiucciu avia l'acellu in bocca. N'aghju pientu.

Antone, 10 anni.

A' caccia.

Sabatu sò andatu à caccia cù babbu.

Ghjunti ind'a furesta avimu vistu una casaccia carca di lellera. Ci simu piattati daretu è avimu aspettatu una bella stonda. Eccu un acellone neru chì si lampa nantu à u lelleraghju per manghjà. Babbu tira è u tomba. Era un merlu bizzichigiallu.

Cristianu, 9 anni.

L'accidente di vittura.

Dumenica ci hè statu un accidente di vittura vicinu à a nostra casa. U cunduttore hà vulsutu evità un misgiu è hà minatu ind'u muru di u nostru ortu. Ind'a vittura ci era u babbu, a mamma è u figliolu di 14 anni. A mamma era ferita in capu è l'ambulanza l'hà purtata à l'ospedale in Bastia.

Antone, 10 anni.

L'anniversariu.

Mercuri sò andata ind'è Pasqualina per festighjà u so anniversariu. Avimu manghjatu torta è fiadoni. Pasqualina hà avutu parechji rigali : una bicicletta, una penna in oru, un braccialettu in argentu, una borsa in coghju, libri, dischi è une poche di scatule di cicculate. Era cuntentissima. Avimu statu à sente a musica, cantatu è ballatu. Hè stata una bella ghjurnata.

Natalina, 10 anni.

U " misciù "

Sabatu sera, babbu è ziu anu tombu un muntone. L'anu salitu, impeveratu è po l 'anu infirzatu nantu à un' asta di ferru è l'anu messu sopra à un focu di rusta. Trè orette dopu a carne era cotta. L'avimu manghjata trà i parenti è vicini. Oh, cum'ella era bona !

Cristianu, 10 anni.

U tarentulu.

Sabatu sò andata à u fiume cù a mo amica. Quand' è no simu ghjunte à l'urice di l'acqua, ella si mette à stridà. Aghju dumandatu ciò ch' ella avia. Avia vistu un tarentulone giallu rigatu di neru. Quandu l'aghju vistu, aghju avutu paura ancu eiu è sò fughjita.

E castagne.

Mercuri, sò andata in Orezza, cù babbu è mamma per coglie e castagne.

A' u paese, avemu pigliatu u nostru spurtellu, a nostra ruspaghjola è, cù u sumere di mammone, simu andati à u castagnetu. N'avemu coltu sette sacchi.

Toccu sera, babbu hà insomatu i sacchi à u sumere è l'hà ghjunti in paese, fendu parechji viaghji.

Mi sentia u spinu da a fatiga.

Ghjisabella, 10 anni

Un sonniu.

L'altra notte aghju sunniatu chì faciamu, cù ziu, un giru à bicicletta. Ziu hà fighjatu l'ora per vede u tempu chì no mettiamu. Andavamu tantu in furia chì sò cascatu è a mo bicicletta era un sumere ; mi sò coltu è sò ghjuntu in casa. Tandu mi sò discitatu.

Un' era chè un sonniu.

Antone, 10 anni

E fasgiole

Mercuri, babbone hà accesu u focu, hà messu e castagne ind'u testu è l'hà fatte arruste. Ognitantu, e vultava scuzzulendu u testu da altu in bassu. Quand'elle eranu cotte, hà intrusciatu una pezza di canavacciu è l'hà messa nantu à e fasgiole per tenele umide. Sbuchjavanu appena tocche è ghjeranu suvurite.

Marianghjula, 10 anni

A carne purcina.

A settimana scorsa avemu tombu u purcellu.

Ziu l'hà scucculatu, babbu l'hà polzu è mamma hà coltu u sangue ind'u stagnone. Dopu l'avemu abbuschjatu è raschjatu. Pulitu ch'ellu era, babbu l'hà apertu è hà cacciato e trippe. Mamma è zia sò andate à lavallo à u fiume.

U lindumane, babbu è ziu anu appezzatu è sceltu coste, lonzi, coppe, prisutti, spalle, bulagne, panzette, è anu staccatu a polpa. D'ista polpa, salita è impeverata ne anu insaccatu salicce è figatelli ch'elli anu appesi sopra à u focu per affumicalli è siccalli.

Ugeniu, 10 anni

A zilimbrina.

Ghjè dumenica. Cù a mo surella, è babbu andemu à facci una spassighjata pè u Ponte à l'Infernu, più indà di u paese.

Da un castagnu, pendeca un ghjembone troncù da u ventu. Più bella zilimbrina ùn pudia infattà. Mi ci appiccu à duie mani, chjamendu à mamma per ch'ella veda ciò chì sò fà. In più bella u ghjembone strappa e mi lampu da sottu in rinculoni.

Sò cascata nantu à i sepali è devimu ghjunghjecine chì aghju e ghjambe è u spinu sfrigiatu.

Ghjulìa, 9 anni

A' piscà.

Un ghjornu sò andatu cù babbu à piscà in fiume. Da nantu à una teppa, babbu lampava in l'onda u filu cù l'amu duv'ellu avia infirzatu un lumbrice rossu. Da l'urice di u fiume mi pigliava a vista di e truite chì facianu colla è fala sottacqua senza tuccà. In più bella u filu s'hè stinzatu. Babbu hà tiratu sessu a so canna. Qualcosa trinnicava azziccatu à l'amu. Paria un serpu : ghjera un'anguilla maiò. Un' avimu chjappu altru nunda è ci ne simu ghjunti.

Cristianu, 9 anni

A piogia.

Piovi, piovi, piovi da u celu abbughjatu,

Nantu à u mo capu allapidatu.

Fala, fala, fala l'acqua,

Nantu à i fiori è l'arburi di a machja.

U celu hè neru, i nivuli sò sburati,

A' pocu à pocu, i fiumi sò sbarzati,

Piovi, piovi, piovi da u celu amantatu...

Suffia, 10 anni

A pulenda.

Venneri scorsu avemu fattu a pulenda.

Mamma hà messu una paghjola d'acqua c'un zinzicu di sale à u focu. Quando l'acqua bullia, hà lampatu a farina castagnina, à pocu à pocu, ind'u mentre chì babbu riminava cù u pulendaghju. Cotta ch'ella era, babbu hà ribuccatu a bomba nantu à una tuvaglia infarinata, è po l'hà affettata cù u filu.

L'avemu manghjata cù u casgiu frescu è u figatellu arrustitu.

Stefanu, 10 anni

U rucone.

Eri, andendu à circà i limoni, aghju vistu un vermu grossu, pilutu, culuritu di rossu è di neru luccicu, ma ùn sapia micca ciò ch'ellu era. L'aghju fattu vede à mamma.

Mamma m'hà dettu ch'ellu era un rucone chì più tardi diventarà una bella farfalla.

Ghjisabella, 10 anni.

Una spassighjata in muntagna.

Un ghjornu, in corsu di vacanze, sò andata à scopre aria cù i mei. Pè a muntagna mi sò ghjucata cù u mo fratellu à corre quindi è culandi. Batti è scumbatti sò cascata à mezi ghicci. Fratellumu si campava di rise

mentre ch'è eu pienghjia da e pene di e spine ciotte nantu à e mo pusatoghje.

Fiorenza, 9 anni.

U focu ind'u carminu.

D'invernu, quand'ellu face u fretu, mamma accende u focu ind'u carminu. Mette un bellu ceppu per capifocu, piazza accantu una manata d'accendime di scopa è ci sciacca nantu legne minute è grosse. Dopu, cù un fulminente, piccia focu à a scopa ch'è caccia e fiaccule sciappittendu. Quandu e legne grosse si accendenu, e vampe sò alte è scallanu bè.

Valeria, 10 anni.

U casgiu frescu.

Per fà u casgiu mamma cola u latte cù una pezza bianca nentru à un stagnone pulitu, aghjusta appena d'impresu è lascia caghjà un' oretta.

Dopu pone e fattoghje nantu à una scafa è, cù u coghju, l'empie tutte di caghjatu.

Pianu pianu, u seru sgotta è u casgiu piglia a forma di a fattoghja. Tandù, mamma u volta da sottu à sopra è ci lampa, nantu, una cria di sale pestu.

Ghjuvannina, 10 anni.

A notte di Natale.

Simu a vigilia di Natale. Sonanu e campane è andemu à a messa di mezanotte. Dettu messa rientrimu in casa. Davanti à u carminu ci sò i rigali ch'è u Bambinu m'hà purtatu : un saccu di surtita in coghju rossu è una puppona tamant'è mè.

Pè u ripastu, mamma hà approntatu un bellu tianu di caprettu è, per appressu, pastizzeria fine à vuluntà.

Fiorenza, 10 anni.

U figatellu arrustitu.

L'altra sera avimu accesu un bellu focu di legne secche. Mamma hà infirzatu quattru tronchi di figatellu ind'u spetu è l'hà messi à calore sopra à a rusta.

Di l'untu ch'è sguttava ne avimu intintu un pane neru spaffatu in dui. Arrustitu ch'è ll'era, mamma hà strintu i pezzi di figatellu mezu à e duie paffe di pane tirendusi u spetu.

Avimu manghjatu pane è figatellu accantu à u carminu è fù a nostra cena. Un deliziu !

Chjarastella, 10 anni.

A neve in piaghja.

Quando era chjuca hà nivatu in piaghja. A mane, arrizzendumi, aghju fighjatu pè u purtellu è aghju vistu a neve. Era cuntenta. E muntagne, l'arburi, i tetti eranu tutti bianchi.

Cù babbu, i mo fratelli è a mo surella simu isciuti in piazza, ma belli cuperti chì si siccava da u fretu.

Babbu hà fattu un barone di neve è dopu l'a vimu pigliatu à pallate.

Chì ghjurnata beata à meza neve ! Mi sò campa !

Valeria, 10 anni.

Capudannu.

U ghjornu di capudannu sò andata cù babbu, mamma, i mo fratelli è a mo surelluccia à dà u bon annu à caccara.

Caccara hè stata cuntenta è ci hà datu centu franchi di strenna à ognunu.

A' meziornu, avemu manghjatu e bugliticce, duie torte è betu u vinu dolce.

Toccu sera ci ne simu ghjunti in casa nostra.

Valeria, 10 anni.

A mo puppattula.

A mo zia m'hà rigalatu una puppattula. Hè bionda cù l'ochji verdi. Hè bella è a chjamu Suffia. Di ghjornu hà un vistitu turchinu è rossu, ma, a sera, per chjinalla, li mettu a so camisgia di notte. Suffia dorme ind' un lettinu cuperta di lenzoli fiuriti è di un cupertoghju turchinu.

Chjarastella, 9 anni.

I brilluli castagnini.

Eri sera, aghju dumandatu à mamma di fammi i brilluli. Ne era in brama.

Prima, avimu stacciatu a farina castagnina è mesu l'acqua à bolle c'una cria di sale. Quando l'acqua bullia, mamma lampava a farina è eiu riminava cù a cuchjara di legnu.

Cotti ch'elli eranu, mamma hà tiratu i brilluli ind' i piatti coppì è l'avimu manghjati cù u latte frescu.

Lorenzu, 9 anni.

A' a neve.

Mercuri sò andata cù Michele à a foce di Verghju. Era nivatu assai. Tempu ghjunti, avimu pigliatu una sculisciaghjola è ci simu pichjati in cima d'una cullata per sguillà à falera. Avimu fattu parechje falate è chjappu parechje strambacate. Toccu trè ore, eramu stanchi è ci ne simu ghjunti in casa, cuntenti cum'è pichji.

Valeria, 9 anni.

A mo zighina.

Mercuri passatu, era in l'ortu è aghju intesu imbelà a mo capra. Sò falatu à vede ciò ch'ella avia. Avia figliatu d'una zighina tutta chjarasgiata, frisgiata nantu à u spinu è stellata à meza fronte.

U mo babbu l'hà fattu un caserottu per aggruttalle.

Frà pocu puderemu munghje a capra è fà u casgiu.

Pasquale, 10 anni.

I muradori.

I muradori cumencianu à travaglià.

U manuale porta a rena cù a bruetta è porta u cimentu ch'ellu buleghja cù a rena, di paletta. Dopu amoglia cù l'acqua per fà a buzana, sempre palittendu da sottu à sopra. Quandu a buzana hè bè minata, a ribocca ind' una camatta è a porta à u maestru di muru.

I muri collanu pocu à pocu, mattone à mattone, è a casa piglia forma. Serà compia frà quattru o cinque mesi.

Cristianu, 9 anni.

Babbone è u misgiu.

Aghju un misgiu neru. Quandu fischju, mi colla nantu à a spalla è mi lecca u collu. A mo mamma ùn vole.

Un ghjornu, babbone pusava è u ghjattu, abituatu cù mè, li salta nantu a spalla. Babbone, chì ùn hà micca ghjatti è poca pazienza, hà avutu paur a, l'hà datu una manata è l' hà lampatu in terra. U misgiu hà capitu è avà, quand' ellu vede à babbone, scappa.

Patrizia, 10 anni.

L 'accidente di trattore.

Ultimamente, babbu hè andatu pè e Poghje cù u so trattore. Quand'ellu hà chjappu a cullata, à l'entrata di u chjosu, u trattore s'hè arrizzatu, s'hè giratu versu a ripata è hà vultulatu. Babbu avia u pede chjappu mezu à i dui manichi di e vitezze è s'hè stortu a chjavetta saltendu. Ancu di grazia ch'ellu hà saltatu chì si pudia esse tombu !

Michele, 10 anni.

I disertori.

In tempu di a guerra di quattordecì, ind'e machje di Biguglia, ci eranu i disertori. Una sera sò vinuti ind'è u babbu di mammone è anu chersu da manghja. U mo arcibabbone l'hà datu da manghjà è da beie. Dopu

si ne sò andati per paura di fassi piglià da i gendarmi ch'è i ricircavanu. Mammone ùn avia chè ott'anni è hà avutu una paura scema.

Antone, 10 anni.

E vugliticce.

Eri avimu manghjatu e vugliticce. Mamma hà preparatu una pasta di farina, d'ovu, di latte, cù un'unghja di levitu è un zinzicu di sale. L'hà minata bulighjenduci i pezzi di casgiu frescu. Dopu hà versatu a pasta cù a cuchjara ind'a frissoghja d'oliu bullente. Avimu fattu cullazione di vugliticce è ci simu campi.

Ugeniu, 10 anni.

A mascara.

L'altu ghjornu, u mo fratellu hè entratu in casa tirendu un stridu. Avia a so faccia listessa à quella di u scimiu. Mi truvava vicinu à a porta. Spaventata, sò scappata à rifugiami in braccie à babbu. Tandù, mi sò avvista ch'è fratellumu si era mascaratu cù una visera di scimiu è aghju risu.

Marianghjula, 9 anni.

A burla.

Per Natale aghju fattu una burla à u mo fratellu. Sapia ch'ellu aspettava un rigalu da a so cumare.

Aghju pigliatu una scatula è ci aghju messu un chilò di sale. L'aghju impacchittata di bella carta è ligata di un frisgettu giallu.

Quandu u mo fratellu hè ghjuntu l'aghju datu u pacchettu.

Fratellumu si rallegrava dicendu : " U mo magnetofonu ! ". Subitu subitu hà apertu a scatula è a trovu u sale. S'hè fermatu à bocca aperta è mi sò campa di rise.

Valeria, 10 anni.

A pesca cù u pinnatu.

Sabatu sò andatu cù babbu à dirascà i nocioli.

Compiù ch'è no avemu ci ne simu falati pè u fiumicellu. Avemu pisatu una petra, un'anguilla hè scappata è babbu

L'hà tronca in dui minenduli di spinu di pinnatu. Avemu cuntinuatù à piscà, eu pisendu e petre è babbu minendu di pinnatu à l'anguille. N'avemu chjappu una decina. Mamma e ci hà fatte frighje u lindumane.

Federicu, 10 anni.

I catelli.

Dumenica a mo cuchja hà catellatu nantu à u vechju camione. Hà fattu nove catelli. Dui anni u pelame falu, trè sò russicci è quattru turcati.

Quando u mo cane v`a vicinu à u camione, a cuchja abbaghja.

L'altreri, mi sò avvista ch`i ùn firmava più chè quattru catelli è mi dumandu duve l'altri ponu esse chjappi.

Mariachjara, 10 anni.

A merendella.

U luni di Pasqua sò andatu à f`a a merendella cù u mo cuginu. Avimu purtatu pullastru in arrostu, casgiu, pane, u nostru campanile è a nostra ghjallina piena d'ove in ciculata.

Dopu manghjatu, ci simu ghjucati à corre, à appichjacci à l'arburi, a cincinacci è f`a capriole in l'erba fresca.

Simu rientrati in casa à u ciuttà di u sole, stanchi è cuntenti.

Cristianu, 9 anni.

U mo canarinu.

L'estate scorsu, un amicu m'h`a rigalatu un bellu canarinu giallu. Manghjava e grane di scagliola è pizzicava e fronde d'insalata. Tutte e matine li pulia a so gabbia è li cambiava l'acqua di u so bagnu. Era alegru è fischjava tutta a ghjurnata.

L'altra mane, aghju lasciatu a porta di a gabbia aperta è u mo acellucciu si n'h`è andatu. M'h`a miraculi dispiacciutu !

Veronica, 10 anni.

U mo canucciu lupu.

Venneri, babbu hà ghjuntu un canucciu lupu. Ghjè neru cù e zampe russicce. Quando ghjungu da a scola, m'incorre è mi mursica i pedi per ghjucassi. Ognitantu, si stippa à u misgiu, ma u ghjattu si rivolta in zerga è caccendu e sgrinfie. Aghju paura ch'ellu ùn li faccia male.

U chjamu Sboccamuntagna.

Saveria, 10 anni.

In battellu.

Ind'e vacanze di pasqua, aghju pigliatu u battellu sin'à Marseglia per andà in Montpellier à vede à Caccaru è à Caccara. U mare era tantu mossu ch`i l'acqua cullava nantu à u ponte di u battellu. Quelli ch`i escianu da a so cabina rientravanu prestu prestu, trosci lapidi.

Fiorenza, 9 anni.

U misgiu è u serpu.

Uni pochi di ghjorni fà, u mo misgiu hà trovu un serpu in l'erba secca. Era longu, giallu è neru. L'hà chjappu pè u collu è l'hà trinnicatu per tumballu. Mortu ch'ellu era, u misgiu u s'hà pigliatu in bocca è si n'hè andatu.

M'hà spaventatu è stumacatu.

Anna, 10 anni.

L'urtucciu.

Dumenica scorsa, cù u mo cuginu è u mo fratellu ci avemu fattu un urtucciu. Avemu zappatu, tiratu i solchi è piantatu fave, pisi, insalata, radichji è ancu uni pochi di fiori. Dopu l'avemu accintu di reta per parallu da e ghjalline.

I legumi è i fiori principianu à nasce. Speremu ch'elli crisceranu.

Annamaria, 10 anni.

L'ove di l'Ascensione.

Ghjovi era l'Ascensione. Sò falatu à piglià l'ove ind'u nidu è l'aghju purtate à mamma. Si ne hà tenuto unu è l'hà marcatu d'una croce. Dopu m'hà mandatu à purtanne unu à mammone è unu à zia. U nostru l'avimu appesu sopra à u lettu per prutege a nostra casa da u focu, da a timpesta è altre disgrazie.

Michele, 10 anni.

U veranu.

U veranu hè di ritornu. L'acelli sò cuntenti è cantanu à voce rivolta. U sole hè più luminosu è più callu. L'arburi di l'ortu cumencianu à sbucciassi è i fiori si spannanu dendu tanti culori di gioia à tutta a natura. Chì meraviglia u veranu !

Valeria, 10 anni.

Un fiore manghjacarne.

Un ghjornu di veranu a mi spassighjava ind'u pratu daretu à a nostra casa. Per casu, aghju vistu un fiore sbucciatu, russicciu. Fighjendulu da vicinu, aghju rimarcatu ch'ellu era pienu di mignoculi morti. Pensu ch'ellu era u fiore d'una pianta manghjacarne.

Veronica, 10 anni.

In isula d'Elba.

Dumenica simu andati in l'isula d'Elba. Ci simu arrizzati à l'alba per piglià u battellu à 6 ore. U viaghju hà duratu quattru orette. Tempu sbarcati simu andati à visità à Portuferraiu è po dopu, a casa duv'ellu hè statu Napulione quand'ellu era in esiliu. Avimu vistu parecchje cose antiche. Avimu avutu à andà à manghjà nantu à l'erba per via chì ci era troppu mondu in l'osterie.

Versu 6 ore di sera, avimu ripigliatu u battellu per rientre in Bastia.

Saveria, 10 anni.

L'erba di l'Ascensione.

Ghjovi simu andati à circà l'erba di l'Ascensione. Avimu fattu un pezzu di strada in vittura. Per ghjunghje à u locu duv'ella nasce l'erba, avimu cuntinuatatu à pedi una viottulella fatta da l'animali è chì babbu hà avutu à dirascà. Avimu coltu l'erba ind'u spurtellu, à bastanza per noi è u nostru parentatu. A'u ritornu, n'avimu appesu un mazzulellu à u crucifissu per prutege a nostra casa da i pericoli.

Cristianu, 10 anni.

U trifogliulu à quattru foglie.

Dumenica scorsa, in l'ortu, aghju trovu un trifogliulu à quattru foglie. In furia, l'aghju detta à mammone, à Gabriella, à Mariantonia è à Francesca. Tutte, ci simu messe à circanne d'altri. Cù mammone n'avemu trovu quindici è n'aghju fattu un mazzulettu. S'ella hè vera chì u trifogliulu à quattru foglie porta fortuna, pensu d'avenne à bastanza per esse fortunata pè a mo vita.

Suffia, 10 anni.

Troppu imburati.

Eri sera sò andatu cù Petru à manghjà e chjarasge prumaticce. Ci simu bè imburati, forse appena troppu, postu chì barchenduci da l'arburu u pantalone di Petru s'hè strappatu...

Michele, 10 anni.

E pullezze.

Eri sera, babbone hà compru quattru pullezze. L'avimu messe in pullinaghju. Dopu simu andati à cumprà u granu per dalli à manghjà.

Sò eiu chì sò incaricatu d'occupami di e ghjalline, matina è sera.

Frà pocu cuminciaranu à fà l'ove è tandu, mamma ci ne farà tante frittate è pastizzi.

Stefanu, 10 anni.

A pruvista di rena.

Babbu acconcia a nostra terrazza. Mercuri per aiutallu aghju travagliatu cù ellu è cù Mohamed u so manuale. Eu, era nantu a rimorca è empiia u stagnone di rena, Mohamed u facia cullà cù u canapu appesu à a tagliola è babbu spindicava u stagnone è u ribuccava nantu à a terrazza.

Compiu chì no avimu, ci ne simu entrati in casa per rinfrescacci, stanchi ma cuntenti.

Michele, 10 anni.

U falcu è u serpu.

Marti, rientrendu cù babbu da Tagliu Isulacciu, andavamu in vittura pian pianinu. Nantu à a strada avimu vistu un falcu chì si ne vulava cù un serpu in bocca. Era a prima volta chì vidia una cosa simile.

Babbu m'hà amparatu chì un falcu si manghja un centu di serpi l'annu.

Ghjannantone, 10 anni.

A piantera di i pomi

A settimana passata, sò cullatu cù babbu pè e Poghje induv'è no avimu una bella piana. L'avimu dirascata è laburata cù u trattore.

Eri babbu hà tiratu i solchi di merone è l'avimu posta à pomi.

Avà, ci tocca à aspettà ch'elli naschinu per maghjincalli è trasolcalli. I cacciaremu di ghjungnu à luna vechja.

Michele, 10 anni.

In Bastia.

Sabatu sò andatu in Bastia à spassighjà cù Babbu è cù Mamma. Simu falati à vede u portu. Ci era un battellone biancu è bellu da duve surtitanu vitture è ghjente carche di valisge. Dopu simu andati à visità i magazini, ma eu fighjava soprattutu i ghjoculi ind'e vetrine.

Pè i carrughji, ci era tantu mondu chì i pulizzeri devianu regulà a circolazione.

Cristianu, 9 anni.

I sparagi.

Dumenica scorsa, sò andatu cù babbu à circà i sparagi. Avimu marchjatu assai pè a machja è u purettu è n'avimu trovu un bellu mazzulu.

Mamma n'hà fattu una frittatone chì no avimu manghjatu dopu a suppa.

Ghjannantone, 10 anni.

E chjarasge

Dumenica, cù i mei, simu andati à u paese di a Porta per vede à mammone.

Ci era un chjarasgiu carcu di frutti maturi. Mi sò appichjata.

Mamma m'hà dettu : " Si tù cogli e chjarasge ti faraghju a cunfettura ".

Empiutu ch'ellu hè statu, u sacchettu m'hè scappatu.

" Avà a cunfettura hè fatta " hà dettu mamma. A mo surella s'hè campa di rise.

Natalina, 10 anni.

A cagnuccia di a mo vicina.

A cagna di a vicina hè diventata gattiva dipoi ch'è anu tombu i so canucci. Ghjè tamant'è un misgiu ma ha i denti pinzi.

Mercuri, mamma rivenia da u mercatu cù u mo fratellu. A cagnuccia, piattendusi, avanzava pianu pianu. Vicinu ch'ella era da u mo fratellu, s'hè messa à abbaghjà è à mursicà. Mamma hà pigliatu un battulellu è l'hà minata in capu.

Dipoi a cagna ùn s'avvicina più è abbaghja da luntanu.

Anna, 10 anni.

I pattini.

Dumenica, cù babbu è mamma sò andata in Bastia ind'è a mo cugina.

Dopu meziornu, tutti insieme, simu andati nantu à a piazza. Cum'è no aviamu purtatu i pattini à rotule aghju avutu a voglia di pattinà. Stendu assente à mamma ùn aghju messu chè unu per principià. Ruzava cusì bè ch'è ghjera un piacè. Ma quandu aghju messu i dui, m'aghju chjappu una strambagata.

Mamma ridia, eiu nò...

Patrizia, 10 anni.

A tundera.

L'altreroni, trè amichi sò venuti ind'è noi per aiutà à babbu à tonde e pecure.

Dui tenianu a pecura è l'altru a tundia cù una furbicia elettrica. Facianu più prestu chè cù e furbici à manu.

A'meziornu tutte e pecure eranu tose. Ma cum'elle eranu goffe, signore !

Ghjuvannina, 10 anni.

L'incendiu.

Una sera di ferraghju, u nostru cane abbaghjava. Babbu esce di casa per vede ciò chì ci era. U pughjale era tantu incesu chì e fiaccule cullavanu in celu alluminendu u circondu. Babbu avia paura chì u focu ùn ghjunghjissi à i camion.

Dopu sò ghjunti i pompieri è anu spintu u focu. Babbu era spenseratu.

Federicu, 10 anni.

E fole di Babbone.

U piacè di Babbone era di cuntami fole. Frà tante, mi ricordu di quella di " I dui induvinelli " :

- Per maritassi cù a figliola di u rè, ci vulia à poneli dui induvinelli.
- Un giovanu paisanu, pocu struitu ma pienu di bon sensu, li pone questi quì :
- " Nona hà tombu à Paula è Paula ne hà tombu trè ".
- " Un'durmì nè celu nè terra è aghju vistu u mortu chì trè vivi purtava ".
- A principessa ùn ci capì nunda è u giovanu paisanu diventò principe.

Ma, o Babbò, chì volenu di isti induvinelli ?

Babbone ùn rispundia micca chì si era addurmintatu.

Valeria, 10 anni.